

RAPÒRT RESUMÍ

E institushonnan di kontraloria di diesun diferente pais miembro di CAROSAI (Caribbean Organization of Supreme Audit Institutions) a hasi un auditoria kolaborativo di e manera ku ta tene destaho públiko den nan respektivo paisnan. Sekretariado di CAROSAI a koordiná ehekushon di e auditorianan kolaborativo akí ku asistencia di Inter-American Development Bank. Resultado di e auditorianan lo keda presentá na CAROSAI den kuadro di e prinsipio di interkambio di informashon entre e paisnan miembro.

Komo parti di e auditoria kolaborativo, Kontraloria General di Kòrsou (di awor padilanti: Kontraloria) a hasi un auditoria di e práktika di destaho públiko na Departamento di Oبرانان Públiko (di awor padilanti: Departamento) di Ministerio di Tráfiko, Transporte i Planifikashon Urbano (di awor padilanti: Ministerio). Na 2016, Departamento a gasta NAf 38,9 mion na infrastrukura di kaminda. E suma akí a representá 11% di gobièrnu di Kòrsou su gastunan di kapitaaldienst. Esei ta surpasá e porsentahe mínimo (1%) di e kriterio pa materialidat ku Kontraloria ta apliká ora di auditá kuenta anual di gobièrnu.

Tin lei, regla i instrukshon ku gobièrnu tin di kumpli kuné ora di hasi destaho públiko.

Nos a hasi e auditoria akí ku e intenshon di duna Parlamento, e pagadó di impuesto i públiko en general siguransa ku e fondonan ku a konfia gobièrnu kuné a ser usá konforme lei. Meta di e auditoria tabata pa:

Determiná si e manera ku Departamento di Oبرانان Públiko di Ministerio di Tráfiko, Transporte i Planifikashon Urbano ta hasi destaho públiko pa infrastrukura di kaminda ta di akuerdo ku e lei-, regla-, prosedimentu- i otro kriterionan general aplikabel.

Konklushon

Nos ta konkluí ku:

E manera ku Departamento di Oبرانان Públiko di Ministerio di Tráfiko, Transporte i Planifikashon Urbano a hasi destaho públiko pa infrastrukura di kaminda a kumpli parsialmente ku e lei- regla-, prosedimentu- i otro kriterionan general aplikabel pa projektonan ku a paga den 2016.

Nos konklushon ta basá riba e siguiente echanan:

1. e fase di planifikashon a kumpli parsialmente ku e lei-, regla-, prosedimentu- i otro kriterionan general ku ta aplikabel, en bista ku:
 - Departamento no a basa su destahonan pa infrastruktura di kaminda riba un maneho aprobá pa minister;
 - e plannan di mantenshon anual konserní no tabatin aprobashon formal di minister;
 - bestèk (dokumento ku lista di spesifikashon) di e proyektonan no a risibí aprobashon formal di minister promé ku e destaho públiko a tuma lugá;
 - Departamento no tabatin un lista kompleto di kriterio pre-establesí;
 - den bestèk di e proyektonan no tabatin konsepto di e kontrato korespondiente.
2. e fase di oferta a kumpli parsialmente ku e lei-, regla-, prosedimentu- i otro kriterionan general ku ta aplikabel, en bista ku Ministerio no tin un “Internal Controller” pa presentá informe na Ministerio riba e prosedimentu di destaho públiko. Aunke Ministerio di Finansa tabata presente na e eventonan di destaho públiko, nos no a risibí informe di tur e eventonan.
3. e fase di evaluashon a kumpli parsialmente ku e lei-, regla-, prosedimentu- i otro kriterionan general ku ta aplikabel, en bista ku:
 - e komishon di evaluashon di Departamento no a usa un sistema predefiní pa evaluá e ofertanan i determiná skor di kada un;
 - Departamento no a publiká ta ken a gana e destaho.
4. e fase di finalisashon di kontrato no a kumpli ku e lei-, regla-, prosedimentu- i otro kriterionan general ku ta aplikabel, en bista ku Ministerio no a firma un kontrato ku e kontratanan.
5. e fase di maneho i implementashon di kontrato a kumpli ku e lei-, regla-, prosedimentu- i otro kriterionan general aplikabel.

Aunke no a kumpli ku tur aspekto fihá den lei den e proseso di tene e destahonan, nos no por a determiná ku e gastunan hasí pa kontratashon di e proyektonan di infrastruktura di kaminda tabata ilegal, ya ku e aspektonan ku no a kumpli kuné no a afektá legalidat di e gastunan. E proyektonan ku nos a evaluá a kumpli ku Ordenansa di Presupuesto, i minister a aprobá otorgamentu di tur e proyektonan.

Mas aleu, e kuadro hurídiko di destaho públiko **no a kubri tur** aspekto relevante di e manera ku ta hasi destaho públiko. Algun di e aspektonan akí ta kubrí (parsialmente) den e leinan publiká resientemente tokante destaho públiko. E aspektonan ku ainda no ta kubrí den lei ta lo siguiente:

- ku mester konsipiá un kontrato modelo i inkluí esaki huntu ku e bestèk;
- ehekushon i monitoreo di e trabou; i
- sanshon den kaso di inkumplimentu.

Mester diseñá i ehekutá e proseso di destaho públiko di tal manera ku ta minimisá e riesgo di konflikto di interes, froude i konspirashon, pa asina garantisá un kompetensia transparente i hustu den kua un i tur por partisipá.

Rekomendashon

Nos ta rekomendá Parlamento usa su derecho di hasi pregunta pa pidí minister di Tráfiko, Transporte i Planifikashon Urbano bini ku un plan pa eliminá tur defisiensiá ku tin serka Departamento den e diferente fasenan di e proseso di destaho públiko.

Den e plan, minister tin di indiká kua ta e akshonnan ku lo tuma pa eliminá e defisiensianan. Pa kada fase, e akshonnan akí lo mester ta dirigí riba e siguiente puntonan:

1. Pa e fase di planifikashon, minister tin ku:
 - a. formulá, riba un plaso rasonabel, un maneho pa infrastruktura di kaminda. E maneho akí mester ofresé pouta i kriterio pa determiná kua ta e kamindanan ku mester inspeksioná, na ki momento i di ki manera;
 - b. duna su aprobashon formal di e plan anual di mantenshon i e kompromiso pa ehekutá e plan;
 - c. duna su aprobashon formal di e bestèknan, promé ku e evento di destaho públiko tuma lugá;
 - d. formulá kriterio pre-establesí pa evaluá oferta i inkluí e kriterionan akí den e bestèknan; i
 - e. konsipiá un kontrato modelo i inkluí esaki huntu ku e bestèknan.
2. Pa e fase di oferta, minister tin ku yena e funshon di Internal Controller òf hasi un petishon formal di asistencia na Ministerio di Finansa. E Internal Controller tin ku reportá regularmente na Ministerio tokante e proseso di destaho públiko.
3. Pa e fase di evaluashon, minister tin ku sòru pa Departamento:

- a. usa e kriterionan pre-establesí pa evaluá oferta i e faktornan di ponderashon ku ta den e bestèknan, pa evaluá i determiná skor di e ofertanan;
 - b. publiká ta na ken a otorgá e proyekto.
4. Pa e fase di finalisashon di kontrato, minister tin ku firma un kontrato ku e kontratistanan ku ta kubri tur término i kondishon di e proyekto.

Den su reakshon fechá 28 di Novèmber 2018 e minister a indiká ku aunke e no a logra reakshoná riba e kontenido di e rapòrt lo e tene kuenta ku e rekomendashonnan di Kontraloria den e implementashon di e plan di mehorashon di e proseso di destaho públiko.

Tambe nos ta rekomendá Parlamento hasi e enmiendanan nesesario na Dekreto Nashonal di Regla pa Destaho Públiko 2018, P.B. 2018 no. 9, di manera ku e Dekreto lo inkluí regla tokante:

1. trahamentu di konsepto di kontrato modelo ku mester ta inkluí den e bestèk;
2. firmamentu di kontrato ku e kontratistanan;
3. un kódigo di kondukta i un deklarashon tokante funshon i/òf aktividat sekundario pa Departamento;
4. ehekushon i monitoreo di e trabou; i
5. sanshon den kaso ku keda sin kumpli ku e reglanan.